

ЎЗБЕКИСТОН РЕСПУБЛИКАСИ
ҚИШЛОҚ ВА СУВ ХЎЖАЛИГИ ВАЗИРИНИНГ
БҲЙРУҒИ

356 Тракторлар, трактор тиркамалари, йўл-қурилиш ва мелиоратив техника, ўзиюрар машиналарни рўйхатдан ўтказиш, уларга давлат рақами белгиларини ва техник паспортларни, шунингдек қишлоқ хўжалиги машинаси гувоҳномасини бериш тартиби тўғрисида низомни тасдиқлаш ҳақида

Ўзбекистон Республикаси Адлия вазирлиги томонидан 2013 йил 2 июлда рўйхатдан ўтказилди, рўйхат рақами 2476

Ўзбекистон Республикаси Вазирлар Маҳкамасининг 2012 йил 6 декабрдаги 345-сон «Қишлоқ хўжалиги ва мелиоратив техникани, асбоб-ускуналарни ҳисобга олиш ва уларнинг техник ҳолатини назорат қилиш тизимини такомиллаштириш чора-тадбирлари тўғрисида»ги қарорига (Ўзбекистон Республикаси қонун ҳужжатлари тўплами, 2012 й., 50-сон, 559-модда) мувофиқ **буюраман:**

1. Тракторлар, трактор тиркамалари, йўл-қурилиш ва мелиоратив техника, ўзиюрар машиналарни рўйхатдан ўтказиш, уларга давлат рақами белгиларини ва техник паспортларни, шунингдек қишлоқ хўжалиги машинаси гувоҳномасини бериш тартиби тўғрисида низом иловага мувофиқ тасдиқлансин.
2. Мазкур буйруқ расмий эълон қилинган кундан эътиборан кучга киради.

Вазир

З. РУЗИЕВ

Тошкент ш.,
2013 йил 11 май,
99-сон

Ўзбекистон Республикаси
қишлоқ ва сув хўжалиги вазирининг
2013 йил 11 майдаги 99-сон буйруғига
ИЛОВА

**Тракторлар, трактор тиркамалари, йўл-қурилиш ва мелиоратив техника, ўзиюрар машиналарни рўйхатдан ўтказиш, уларга давлат рақами белгиларини ва техник паспортларни, шунингдек қишлоқ хўжалиги машинаси гувоҳномасини бериш тартиби тўғрисида
НИЗОМ**

Мазкур Низом Ўзбекистон Республикаси Вазирлар Маҳкамасининг 2012 йил 6 декабрдаги 345-сон «Қишлоқ хўжалиги ва мелиоратив техникани, асбоб-ускуналарни ҳисобга олиш ва уларнинг техник ҳолатини назорат қилиш тизимини такомиллаштириш чора-тадбирлари тўғрисида»ги қарорига (Ўзбекистон Республикаси қонун ҳужжатлари тўплами, 2012 й., 50-сон, 559-модда) мувофиқ тракторлар, трактор тиркамалари, йўл-қурилиш ва мелиоратив техника, ўзиюрар машиналарни (бундан буён матнда техника деб юритилади) рўйхатдан ўтказиш, уларга давлат рақами белгилари ва техник паспортларни, шунингдек қишлоқ хўжалиги машинаси гувоҳномасини бериш тартибини белгилайди.

I боб. Умумий қоидалар

1. Мазкур Низомнинг талаблари ташкилотлар, деҳқон ва фермер хўжаликлари ҳамда фуқароларга мажбурийдир.

2. Техникани рўйхатдан ўтказиш, унга давлат рақами белгилари ва техник паспортини, шунингдек қишлоқ хўжалиги машинаси гувоҳномасини бериш Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимлиги ҳузуридаги Машина ва асбоб-ускуналарнинг техника ҳолатини назорат қилиш давлат бош инспекциясининг Қишлоқ хўжалиги техникаси бўйича туман ва шаҳар инспекторлари (бундан буён матнда давлат инспектори деб юритилади) томонидан мазкур Низомга мувофиқ амалга оширилади.

II боб. Техникани ва қишлоқ хўжалиги машиналарини рўйхатдан ва қайта рўйхатдан ўтказиш

3. Техника эгалари томонидан техника ва қишлоқ хўжалиги машиналари сотиб олинганда ёки қабул қилиб олинганда, шунингдек техник ҳужжатларга ўзгартиришлар киритиш лозим бўлганда, техниканинг техник ҳолатидан қатъи назар, техника эгалари 10 кун ичида яшаш манзилидаги давлат инспекторига уларни рўйхатдан ўтказиш учун мурожаат қилдилар.

4. Техникаларга давлат рақами белгиси ҳамда техник паспорт бериш ва қишлоқ хўжалиги машиналарига гувоҳнома бериш учун энг кам ойлик иш ҳақи миқдоридан:

трактор, трактор тиркамаси, йўл-қурилиш ва мелиоратив техника, ўзиюрар машинага рақам белгиси берилганлиги учун — 0,9;

трактор, трактор тиркамаси, йўл-қурилиш ва мелиоратив техника, ўзиюрар машинага техник паспорт берилганлиги учун — 0,17;

қишлоқ хўжалиги машинасига гувоҳнома берилганлиги учун — 0,17;

трактор, трактор тиркамаси, йўл-қурилиш ва мелиоратив техника, ўзиюрар ва қишлоқ хўжалиги машинаси, шунингдек асбоб-ускуналар ҳисобдан чиқарилганлиги учун — 0,18;

трактор, трактор тиркамаси, йўл-қурилиш ва мелиоратив техника, ўзиюрар ва қишлоқ хўжалиги машинаси қайта рўйхатга олинганлиги учун — 0,18;

рақам белгиси, эгасининг яшаш жойи ўзгарган ва бошқа ҳолатларда трактор, йўл қурилиш ва мелиоратив техника, ўзиюрар машиналарнинг техник паспортида ёзув амалга оширганлиги учун — 0,17;

рақам белгиси ўзгарган ҳолларда трактор тиркамасининг техник паспортида, шунингдек эгасининг яшаш жойи ўзгарган ва бошқа ҳолатларда қишлоқ хўжалиги машинаси гувоҳномасида ёзув амалга оширилганлиги учун — 0,08 миқдорда йиғим ундирилади.

Йўқотилган давлат рақам белгиси, техник паспорт ва гувоҳнома ўрнига янгиси берилганлиги учун кўрсатилган сумма 5 баробар миқдорда ундирилади.

5. Техника эгалари томонидан техникаларини ва қишлоқ хўжалиги машиналарини рўйхатдан ўтказиш учун давлат инспекторига қуйидаги ҳужжатлар тақдим этилади:

мазкур Низомнинг 1, 2-иловаларига мувофиқ ариза;

техника ва қишлоқ хўжалиги машинасини сотиб олинганлигини тасдиқловчи ҳужжат;

техника ва қишлоқ хўжалиги машинаси ишлаб чиқарилган завод томонидан берилган техник ҳужжатлар;

хорижий давлатлардан олиб келинган техника ва қишлоқ хўжалиги машинасининг божхона расмийлаштирувидан ўтказилганлиги тўғрисидаги гувоҳнома;

белгиланган йиғим тўланганлигини тасдиқловчи ҳужжат.

6. Техника ва қишлоқ хўжалиги машинаси эгалари ўзгарганда мазкур Низомнинг 1, 2-иловаларига мувофиқ ариза, белгиланган йиғим тўланганлигини тасдиқловчи ҳужжат ва қуйидаги ҳужжатлардан бири давлат инспекторига тақдим этилади:

нотариал идоралари томонидан берилган ҳужжат (олди-сотди, ҳадя, айирбошлаш, лизинг, сублизинг шартномалари, ворислик, мерос ва бошқалар);

мулкка эгалик қилиш ҳуқуқини берувчи ҳужжат (шартнома, гувоҳнома ва бошқалар);

техника ва қишлоқ хўжалиги машиналари устав фондига киритилганлиги ва чиқарилганлиги тўғрисидаги ҳужжат;

суд қарори;

ташкилотнинг рўйхатида бўлган машиналарни балансдан балансга берилганлиги тўғрисидаги қарор ёки буйруқнинг нусхаси;

бир молиявий тизимдаги ташкилотлар учун юқори органларнинг балансдан балансга бепул ажратилганлиги тўғрисидаги буйруғидан нусха.

7. Техника ва қишлоқ хўжалиги машинаси эгаларининг номи (Ф.И.О.) ўзгарганда қайта рўйхатга олиш учун қуйидаги ҳужжатлар давлат инспекторига тақдим этилади:

мазкур Низомнинг 1, 2-иловаларига мувофиқ ариза;

номи ўзгарганлигини тасдиқловчи ҳужжат (қарор ёки буйруқ);

жисмоний шахслар учун паспорт, фамилияси, исми ва отасининг исми ўзгарганлигини тасдиқловчи ҳужжат;

белгиланган йиғим тўланганлигини тасдиқловчи ҳужжат.

8. Техника ва қишлоқ хўжалиги машинасининг сақлаш манзили ёки эгаларининг яшаш жойи ўзгарганда қайта рўйхатга олиш учун қуйидаги ҳужжатлар давлат инспекторига тақдим этилади:

мазкур Низомнинг 1, 2-иловаларига мувофиқ ариза;

техник ҳужжатлар (техник паспорт, гувоҳнома);

техника ва қишлоқ хўжалиги машиналарининг жойи ўзгаришига асос бўлган ҳужжат (ижара шартномаси, қарор ва буйруқлар);

жисмоний шахслар учун паспорт;

белгиланган йиғим тўланганлигини тасдиқловчи ҳужжат.

9. Техниканинг рақамли агрегатлари ўзгарганда қайта рўйхатга олиш учун қуйидаги ҳужжатлар давлат инспекторига тақдим этилади:

мазкур Низомнинг 1, 2-иловаларига мувофиқ ариза;

рақамли агрегатлар қонуний сотиб олинганлиги тўғрисида ҳужжат (ҳисоб-маълумотнома, олди-сотди шартномаси, божхона гувоҳномаси, кирим касса ордери ва юк хати).

белгиланган йиғим тўланганлигини тасдиқловчи ҳужжат.

10. Техника эгалари техникаларни ва қишлоқ хўжалиги машиналарини бошқа шахсга бериш билан боғлиқ ишончномалар ва ижарага бериш шартномалари нотариал тартибда тасдиқланган вақтдан бошлаб 10 кун ичида уларнинг ҳисобга қўйиш учун яшаш манзилидаги давлат инспекторига тақдим этадилар.

Техника ва қишлоқ хўжалиги машинасини ҳисобга қўйишда йиғим ундирилмайди.

III боб. Техника ва қишлоқ хўжалиги машиналарини рўйхатдан чиқариш

11. Техника ва қишлоқ хўжалиги машиналари эгалари томонидан бошқа юридик ва жисмоний шахсларга сотилганда ёки фойдаланишга яроқсиз деб топилганда рўйхатдан чиқарилади.

12. Рўйхатдан чиқарилган машиналарнинг давлат рақам белгилари давлат инспекторларига топширилади, техник хужжатларга ва қайд қилиш китобида тегишли белгилар кўйилади.

IV боб. Яроқсиз ҳолга келган ёки йўқотилган давлат рақам белгиси, техник паспорт ва қишлоқ хўжалиги машинаси гувоҳномасини янгисига алмаштириб бериш

13. Техниканинг давлат рақами белгиси, техник паспорти ва қишлоқ хўжалиги машинаси гувоҳномаси яроқсиз ҳолга келган ёки йўқотилган тақдирда, уларнинг эгаси яшаш манзилидаги давлат инспекторига уларни алмаштириш учун мурожаат қилади.

14. Техника эгаси давлат рақами белгиси, техник паспорти ва қишлоқ хўжалиги машинаси гувоҳномасини алмаштириш учун давлат инспекторига қуйидаги хужжатларни тақдим этади:

ариза;

яроқсиз ҳолатда бўлган давлат рақами белгиси, техник паспорти ёки қишлоқ хўжалиги машинаси гувоҳномаси;

белгиланган йиғим тўланганлигини тасдиқловчи хужжат.

15. Яроқсиз ҳолга келган давлат рақами белгиси ва техник паспорт ёки гувоҳнома давлат инспектори томонидан чиқим қилинади.

16. Давлат рақами белгиси ва техник паспорти ёки қишлоқ хўжалиги машинасининг гувоҳномаси йўқолган тақдирда, техника эгаси уларни қайта тиклаш учун давлат инспекторига қуйидаги хужжатларни тақдим этади:

ариза;

йўл ҳаракати хавфсизлиги хизмати органлари томонидан давлат рақам белгиси ва техник паспорти ёки қишлоқ хўжалиги машинаси гувоҳномаси олиб қўйилмаганлиги тўғрисидаги маълумотнома;

белгиланган йиғим тўланганлигини тасдиқловчи хужжат.

17. Давлат инспектори йўқотилган давлат рақами белгиси ва техник паспорт ёки қишлоқ хўжалиги машинаси гувоҳномасини беришдан олдин тегишли техника ва қишлоқ хўжалиги машинасининг амалда мавжудлигини ўрганади.

18. Йўқотилган давлат рақами белгиси ва техник паспорти ёки қишлоқ хўжалиги машинаси гувоҳномасини алмаштириш бўйича техника эгасининг мурожаатидан сўнг, давлат инспектори томонидан 3 кун ичида янгисига алмаштириб берилади.

V боб. Якуний қоида

19. Мазкур Низом Ўзбекистон Республикаси Ички ишлар вазирлиги,

27 (579)-сон

— 13 —

356-модда

«Ўзагромашсервис» уюшмаси ва Ўзбекистон Фермерлари кенгаши билан келишилган.

Ички ишлар вазири

Б. МАТЛЮБОВ

2013 йил 11 май

*«Ўзагромашсервис»
уюшмаси раиси*

Б. АБДУҚОДИРОВ

2013 йил 11 май

*Ўзбекистон Фермерлари
кенгаши раиси*

С. ТУРДИЕВ

2013 йил 11 май

Тракторлар, трактор тиркамалари, йўл-қурилиш ва мелиоратив техника, ўзиюрар машиналарни рўйхатдан ўтказиш, уларга давлат рақами белгиларини ва техник паспортларни, шунингдек қишлоқ хўжалиги машинаси гувоҳномасини бериш тартиби тўғрисидаги низомга

1-ИЛОВА

_____ туман (шаҳар)
Қишлоқ хўжалиги техникаси
бўйича инспектори
_____ га
_____ дан
(Юридик шахснинг номи)

А Р И З А

Сиздан _____
(сўровнинг қисқача мазмуни)

_____ техникани
рўйхатдан ўтказишингизни сўрайман.

Аризага қуйидаги ҳужжатлар илова қилинади:

1. Техника ёки қишлоқ хўжалиги машинаси олинганлиги ҳақидаги ҳужжат 20__ й. «__» _____ -сон
_____ дан берилган.

Ўзбекистон Республикаси қонун ҳужжатлари тўплами, 2013 й.

2. Техника ёки қишлоқ хўжалиги машинаси ишлаб чиқарилган завод томонидан берилган техник хужжат, техник паспорт ёки гувоҳнома.

Олинган техника ёки қишлоқ хўжалиги машинаси ҳақида маълумот:

1.	Тури, номи		5.	Русуми	
2.	Чиққан йили		6.	Чиқарган завод	
3.	Техник паспорт №		7.	Завод №	
4.	Двигатель №		8.	Шасси №	

Раҳбар

(имзо)

М.Ў.

(Ф.И.О.)

Бош ҳисобчи

(имзо)

(Ф.И.О.)

Тракторлар, трактор тиркамалари, йўл-қурилиш ва мелiorатив техника, ўзиюрар машиналарни рўйхатдан ўтказиш, уларга давлат рақами белгиларини ва техник паспортларни, шунингдек қишлоқ хўжалиги машинаси гувоҳномасини бериш тартиби тўғрисидаги низомга
2-ИЛОВА

_____ туман (шаҳар) Қишлоқ хўжалиги техникаси бўйича инспектори
_____ га
_____ дан

А Р И З А

Фуқаро, _____ 20__ й. «__» _____ да туғилган
(Ф.И.О.)

(яшаш манзили)

фуқаролик паспорти серияси рақами _____
_____ ИИБ томонидан 20__ й. «__» _____ да берилган.

Менга тегишли _____

(сўрвнинг қисқача мазмуни)

_____ техникани рўйхатдан ўтказишингизни сўрайман.

Аризага қуйидаги ҳужжатларни илова қиламан:

1. Техника ёки қишлоқ хўжалиги машинаси олинганлиги ҳақидаги ҳужжат 20__ й. «__» _____-сон _____
_____дан берилган.

(ким томондан берилганлиги)

2. Техника ёки қишлоқ хўжалиги машинаси ишлаб чиқарилган завод томонидан берилган техник ҳужжат, техник паспорт ёки гувоҳнома.

Олинган машина ҳақида маълумот:

1.	Тури, номи		5.	Русуми	
2.	Чиққан йили		6.	Чиқарган завод	
3.	Техник паспорт №		7.	Завод №	
4.	Двигатель №		8.	Шасси №	

Фуқаро _____

(имзо)

(Ф.И.О.)

20__ й. «__» _____